

IV. OPOSICIÓN E CONCURSOS**CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL**

RESOLUCIÓN do 11 de xuño de 2024, da Dirección Xeral de Centros e Recursos Humanos, pola que se convoca o concurso de adxudicación de destinos provisionais para o curso académico 2024/25 entre o persoal docente dos corpos de inspectores de educación, catedráticos e profesores de ensino secundario, do corpo, para extinguir, de profesores técnicos de formación profesional, profesores especialistas en sectores singulares de formación profesional, catedráticos e profesores de escolas oficiais de idiomas, catedráticos e profesores de música e artes escénicas, catedráticos, profesores e mestres de taller de artes plásticas e deseño, e do corpo de mestres, que non teñan destino definitivo na Comunidade Autónoma de Galicia, os que resultan desprazados por falta de horario, o persoal a quen se lle conceda unha comisión de servizos por concelleira ou concelleiro, por motivos de saúde ou por conciliación da vida familiar e laboral, o persoal interino e substituto e o persoal funcionario de carreira que solicite o reingreso ao servizo activo (código de procedemento ED002B).

No *Diario Oficial de Galicia* número 113, do 14 de xuño de 2018, publicouse a Orde do 7 de xuño de 2018 pola que se ditan normas para a adxudicación de destino provisional entre o persoal docente pertencente aos corpos de inspectores de educación, catedráticos e profesores de ensino secundario, profesores técnicos de formación profesional, catedráticos e profesores de escolas oficiais de idiomas, catedráticos e profesores de música e artes escénicas, catedráticos e profesores e mestres de taller de artes plásticas e deseño e do corpo de mestres, que non teñan destino definitivo na Comunidade Autónoma de Galicia, os que resultan desprazados por falta de horario, o persoal ao que se lle conceda unha comisión de servizos por concelleira ou concelleiro, por motivos de saúde ou por conciliación da vida familiar e laboral, o persoal interino e substituto e o persoal funcionario de carreira que solicite o reingreso no servizo activo (ED002B), modificada pola Orde do 31 de marzo de 2023 (DOG número 71, do 13 de abril) e outras.

No seu artigo 37, a citada orde establece que «resultos os concursos xerais de traslados, a Dirección Xeral de Centros e Recursos Humanos procederá a realizar no *Diario Oficial de Galicia* a convocatoria de adxudicación de destinos provisionais para o curso correspondente», con indicación a continuación do contido mínimo da citada convocatoria.



Con base no citado artigo, esta Dirección Xeral de Centros e Recursos Humanos

RESOLVE:

Primeiro. Convocatoria

Convocar o concurso de adxudicación de destinos provisionais para o curso académico 2024/25 entre o persoal docente pertencente aos corpos de inspectores de educación, catedráticos e profesores de ensino secundario, do corpo, para extinguir, de profesores técnicos de formación profesional, profesores especialistas en sectores singulares da formación profesional, catedráticos e profesores de escolas oficiais de idiomas, catedráticos e profesores de música e artes escénicas, catedráticos e profesores e mestres de taller de artes plásticas e deseño, e do corpo de mestres, que non teñan destino definitivo na Comunidade Autónoma de Galicia, os que resultan desprazados por falta de horario, o persoal a quen se lle conceda unha comisión de servizos por concelleira ou concelleiro, por motivos de saúde ou por conciliación da vida familiar e laboral, o persoal interino e substituto e o persoal funcionario de carreira que solicite o reingreso ao servizo activo.

Segundo. Prazo de solicitude

O prazo para formular a solicitude, que se presentará da maneira que se establece no artigo 14 da Orde do 7 de xuño de 2018, pola que se ditan normas para a adxudicación de destino provisional entre o persoal docente, será de quince (15) días hábiles, contados desde o seguinte ao da publicación desta resolución no *Diario Oficial de Galicia*.

Aquelas persoas que, estando obrigadas, non presenten unha solicitude, entenderase que se acollen á validez da formulada para o curso académico 2018/19, 2019/20, 2020/21, 2021/22, 2022/23 ou 2023/24, de conformidade co establecido no artigo 21 da citada Orde do 7 de xuño de 2018.

Terceiro. Relación provisional e definitiva do persoal obrigado a participar

As relacións provisionais de persoal que ten a obriga de participar na adxudicación de destinos, por lista única cando proceda e por especialidades e orde de prioridade, publicaranse no portal da internet desta consellería, <https://www.edu.xunta.gal/>, o 9 de xullo de 2024.

Nestas relacións provisionais de persoal que ten a obriga de participar non se incluírá o persoal que vaia ser suprimido e desprazado por falta de horario que, aínda non lle fose



comunicado á Subdirección Xeral de Recursos Humanos, si se incorporará nas relacións definitivas, sen prexuízo daquelas persoas ás cales se lles poida abrir o prazo extraordinario de solicitudes previsto na disposición adicional cuarta da Orde do 7 de xuño de 2018.

Unha vez publicadas as relacións provisionais de persoal que ten a obriga de participar, abrirase un prazo de cinco (5) días hábiles para presentar reclamacións. Transcorrido este prazo, publicarase a lista definitiva do persoal docente que ten a obriga de participar. A data previsible de publicación da lista definitiva é o 26 de xullo de 2024.

Cuarto. *Resolución provisional do concurso de adxudicación de destinos provisionais*

A data previsible de resolución provisional do concurso e a súa publicación no portal de internet desta consellería, <https://www.edu.xunta.gal/>, para todos os corpos, é o 29 de xullo de 2024.

O prazo para formular reclamacións ou renuncias contra a resolución provisional do concurso é de dous (2) días hábiles, contados a partir do seguinte ao da súa publicación no portal da internet desta consellería, <https://www.edu.xunta.gal/>

As reclamacións indicadas no parágrafo anterior formularanse en todo caso por medios electrónicos na sede electrónica da Xunta de Galicia (<https://sede.xunta.gal>). De formular a reclamación de xeito presencial, a persoa reclamante será requirida para que a emende a través da súa presentación electrónica. Para estes efectos, considérase como data da presentación da reclamación aquela en que foi realizada a emenda.

As renuncias á resolución provisional do concurso realizaranse a través do enderezo <https://www.edu.xunta.gal/cadp/> e non resultará necesaria a súa presentación na sede electrónica da Xunta de Galicia.

Quinto. *Adxudicación definitiva dos destinos provisionais*

A data previsible da adxudicación definitiva dos destinos provisionais e a súa publicación no portal a internet desta consellería, <https://www.edu.xunta.gal/>, para todos os corpos é o 2 de agosto de 2024.

Esta adxudicación definitiva terá efectividade do día seguinte ao da súa publicación no portal da internet desta consellería <https://www.edu.xunta.gal/>, sen prexuízo de que a toma de posesión será con efectos do 1 de setembro de 2024.



A adxudicación definitiva dos destinos provisionais publicarase tamén no DOG.

Sexto. Presentación das solicitudes por medios electrónicos

As solicitudes presentaranse obrigatoriamente por medios electrónicos a través do modelo normalizado (anexo I) accesible na sede electrónica da Xunta de Galicia, <https://sede.xunta.gal>

As solicitudes tamén poderán cubrirse na páxina web da Dirección Xeral de Centros e Recursos Humanos, <https://www.edu.xunta.gal/cadp/>, e presentaranse obrigatoriamente por medios electrónicos na sede electrónica da Xunta de Galicia, <https://sede.xunta.gal>, segundo o artigo 14 da Orde do 7 de xuño de 2018.

Os anexos coa relación de centros que pode solicitar o persoal concursante estarán dispoñibles na páxina web <https://www.edu.xunta.gal/cadp/> segundo o seguinte detalle:

Anexo II: relación dos centros que pode solicitar o persoal docente dos corpos de catedráticos e profesores de ensino secundario, o de profesores técnicos de formación profesional, para extinguir, e o de profesores especialistas en sectores singulares da formación profesional.

Anexo III: relación dos centros que pode solicitar o persoal docente dos corpos de catedráticos e de profesores de escolas oficiais de idiomas.

Anexo IV: relación dos centros que pode solicitar o persoal docente do corpo de catedráticos de música e artes escénicas.

Anexo V: relación dos centros que pode solicitar o persoal docente do corpo de profesores de música e artes escénicas.

Anexo VI: relación dos centros que pode solicitar o persoal docente dos corpos de catedráticos e profesores de artes plásticas e deseño e de mestres de taller de artes plásticas e deseño.

Anexo VII: relación dos centros que pode solicitar o persoal docente do corpo de mestres.



Anexo VIII: relación dos centros que pode solicitar o persoal docente do corpo de inspectores de educación.

Santiago de Compostela, 11 de xuño de 2024

Jesús Manuel Álvarez Bértolo
Director xeral de Centros e Recursos Humanos

CVE-DOG: tzcyyqq5-anl4-xsz5-inr2-r25vlayi9pu6

